



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

### კალატობიშვილი მიხეილ გიორგის ძე



#### მ. კალატობიშვილი

კალატობიშვილი მიხეილ გიორგის ძე (19. V. 1959, თბილისი, - 12. X. 2009, მოსკოვი), კინორეჟისორი, პროდიუსერი. დაამთავრა კინემატოგრაფიის საკავშ. სახელმწ. ინ-ტის სადადგმო ფაკ-ტის სარეჟისორო განყ-ბა (ე. ძიგანის სახელოსნო, 1981). ინ-ტის სასწ. სტუდიაში გადაიღო მოკლემეტრაჟიანი ფილმი „მექანიკოსი“ (ა. პლატონოვის მოთხრობის მიხედვით, 1981). მუშაობდა მეორე რეჟისორად მამის - გიორგი კალატობიშვილის ფილმზე „გმადლობთ, რატილი“ (1983), დაასრულა მისივე ფილმი „სკაპენის ოინები“ (მოლიერის პიესის მიხედვით, 1984). „ქართულ ფილმში“ გადაიღო მხატვრული ფილმი „რჩეული“ (პ.

მერიმეს „მატეო ფალკონეს“ მიხედვით, 1991 - მადრიდის საერთაშ. კინოფესტივალის ჟიურის სპეც. პრიზი, 1992; საერთაშორისო კინოფესტივალი „ოქროს არწივის“ სხვადასხვა პრიზები), რ-ის სიუჟეტი და კონფლიქტი ბოლშევიკური გადატრიალების შემდგომ საქართველოში გადმოიტანა. 1992-იდან კ. ცხოვრობდა და მოღვაწეობდა რუსეთში, სადაც გადაიღო მხატვრული ფილმი „მისტერიები“ (2000), დოკუმენტური ფილმები: „ორი ატომი“ (2001), „მესიზმრება ჩემი ქედიანი თბილისი“ (2002), „ფილმი მიხეილ კალატობიშვილზე“ (2006). საერთაშ. წარმატება ხვდა ფილმს „ველური ველი“ (2008 - ვენეციის, მარაკეშის, სოჭის, კოტბუსის საერთაშ. კინოფესტივალების პრიზები, რუსეთის კინოკრიტიკოსთა გილდიის პრემია "თეთრი სპილო", რუსეთის ეროვნული კინოპრემია "ოქროს არწივი" საუკეთესო ფილმის, სცენარისა და მუსიკისთვის) - დრამატულ მოთხრობას დროსა და სიყვარულზე, გმირზე, რ-იც არაადამიანურ გარემოში ადამიანობის შენარჩუნებას ცდილობს. 2000 დააფუძნა ეროვნული კინემატოგრაფიის მხარდაჭერისა და განვითარების

ფონდი - „მიხეილ კალატოზოვის ფონდი“, იყო მისი პრეზიდენტი. დააარსა და 2009 წაატარა ტარუსის I კინოფესტივალი „ერთგული მეგობრები“. იყო პროდიუსერი ფილმებისა: „ღმერთის შემდეგ პირველი“ (რეჟ. ვ. ჩიგინსკი, 2005), „ლოვიტორი“ (რეჟ. ფ. აბდულაევი, 2005), „ვანეჩკა“ (რეჟ. ე. ნიკოლაევა, 2007, ყველა რუსეთი). გადაღებულია ფილმებში: „ადვოკატი“ (რეჟ. ი. ხამრაევი, 1990), „ანას დაბადების დღე“ (რეჟ. ლ. ჯოჯუა, 1992).

***მ. კერესელიძე***

---